

# 9TH ICPPT PELASAR BEKUNSIKA ASIL PENEMU SAINTIFIK BARU

August 4, 2016, Thursday

Borneo Post

KUCHING: Aum besai, '9th International Conference On Plant Protection In The Tropics (9th ICPPT)' ti diatur berengkah kemari (3 Ogos) nyentuk 5 Ogos tu, udah mujur dipenyadika Sapit Kepala Menteri Datuk Amar Douglas Uggah Embas.

Presiden Malaysian Plant Protection Society (MAPPS) Prof. Dr. Abdul Shukor Juraimi madah, aum besai antarabansa nya peluang endur bekunsika asil penemu saintifik baru sereta nempa kaul profesional enggau semua penyaga utai tumbuh di serata dunya.

Aum besai nya ku iya, deka nyadi palan endur berandauka pasal pemar ti ditapi sereta chara tauka pemansang baru dikena nyaga utai tumbuh ti deka dikerandau sereta dipejuraika raban saintis, raban pengatur, orang bumai bekebun ari ejensi perintah, institut pelajar tinggi enggau sektor peribit.

“Taun tu kitai fokus pasal nyaga utai tumbuh ungroup sekuriti enggau pengelikon pemakai seraya dikena napi pinta guna pemakai senipak enggau penyampau tubuh mensia ti majak nambah, ti minta orang bumai bekebun chakah agi nyaga utai tanam sida.

“Aku ngarapka tembu aum besai tu ila, deka bulih penemu baru, pemutus enggau chara ti lebih engkeman sereta ngemansangka chara nagang pengerusak utai tumbuh ti ngemeratka rampa menua.

“Chara ngena tauka nyaga barang kimia ti konvensional enggau teknologi baru dikena nyaga utai tanam ukai semina dikena nyaga sekuriti pemakai tang mega dikena nitihka atur pengelikon pemakai,” ku iya.

Shukor mansutka pekara nya dalam jaku pengelalu iya ba pengawa bejadika 9th International Conference On Plant Protection In The Tropics (9th ICPPT) ke diatur ba sebuah hotel ditu kemari.

Aum besai nya (9th ICPPT) diatur begulai antara Universiti Putra Malaysia (UPM), Universiti Malaysia Sarawak (UNIMAS), Univerisiti Teknomigi Mara Sarawak (UiTM

Sarawak, Lembaga Koko Malaysia, Lembaga Lada Malaysia enggau CropLife sereta disukung Sarawak Convention Bureau.

Rambai jaku aum besai ke-9 iya nya 'Healthy Crops for a Healthy World', ti deka matau chara pemasik pepadu baru sereta inovasyen dikena mutarka penanggul dalam sekuriti pemakai.

Bisi dua iku 'keynote speaker' ti dikangau iya nya Dr. Russell M. Paterson ari Universiti Minho, Portugal (pasal Effects of Climate Change On Crop and Pets in the Tropics) enggau Prof. Emeritus Dr. Jia-An cheng ari Universiti Zhejiang, China (pasal Towards Sustainable Rice Pest Management in China-The Challenges Ahead).

Nambahka nya dua iku 'Plenary Speaker' bisi dikangau bejaku ba aum besai tu iya nya Prof. Dr. Dzolkhifli Omar ari Universiti Putra Malaysia (pasal Biopesticide) enggau Direktor Eksekutif Croplife Asia Dr. Vasant L. Patil ti ngenang pasal The Role of Plant Sciense: Global and Asian Landscape.

Bala penyereta kus nyengkaum ari Sabah, India, Korea, Indonesia kelimpah UPM, UiTM, Lembaga Koko Malaysia enggau ke bukai.

Sama bisi datai ngagai pengerami bejadika aum besai antarabansa nya kemari, Chairman 9th ICPPT Associate Professor Dr. Hafidzi Mohd Noor.